

Na osnovu člana 56. stav 7. Zakona o radu u institucijama Bosne i Hercegovine ("Službeni glasnik BiH", br. 26/04, 7/05, 48/05 i 60/10) i člana 17. Zakona o Vijeću ministara Bosne i Hercegovine ("Službeni glasnik BiH", br. 30/03, 42/03, 81/06, 76/07, 81/07, 94/07 i 24/08), na prijedlog Ministarstva pravde Bosne i Hercegovine, Vijeće ministara Bosne i Hercegovine, na 137. sjednici održanoj 18. novembra 2010. godine, donijelo je

## **ODLUKU**

### **O USLOVIMA I NAČINU POLAGANJA STRUČNOG UPRAVNOG ISPITA PRIPRAVNIKA, LICA SA VISOKOM ŠKOLSKOM SPREMOM I ZAPOSLENIKA NA NIVOU BOSNE I HERCEGOVINE**

#### **I - OPĆE ODREDBE**

##### član 1. (Predmet)

Ovom odlukom uređuju se uslovi, program i način polaganja stručnog upravnog ispita (u daljnjem tekstu: stručni ispit) pred komisijama za polaganje stručnog upravnog ispita Bosne i Hercegovine (u daljnjem tekstu: Komisije) pripravnika, lica sa visokom školskom spremom i zaposlenika u ministarstvima i drugim organima uprave Bosne i Hercegovine, službama, tijelima i institucijama Vijeća ministara Bosne i Hercegovine (u daljnjem tekstu: organi uprave BiH, službe, tijela i institucije Vijeća ministara).

##### član 2. (Obaveza polaganja)

(1) Stručni ispit, saglasno Zakonu o radu u institucijama Bosne i Hercegovine i ovoj odluci, pred Komisijom dužni su polagati: pripravnici i zaposlenici srednje, više i visoke školske spreme u organima uprave BiH, službama, tijelima i institucijama Vijeća ministara i u preduzećima (društvima) i drugim pravnim licima kojima je zakonom Bosne i Hercegovine povjereno obavljanje javnih ovlaštenja (u daljnjem tekstu: institucije koje imaju javna ovlaštenja).

(2) Stručni ispit iz stava (1) ovog člana polaže se radi sticanja uslova za rad na upravnim i drugim stručnim poslovima iz osnovne djelatnosti organa uprave i drugih organa na nivou Bosne i Hercegovine, odnosno na upravnim poslovima u institucijama koje imaju javna ovlaštenja, saglasno propisu o poslovima iz osnovne djelatnosti, odnosno pomoćno-tehničkim poslovima Bosne i Hercegovine.

##### član 3. (Uslovi za polaganje)

(1) Pripravnici u organima uprave BiH, službama, tijelima i institucijama Vijeća ministara i u institucijama koje imaju javna ovlaštenja polažu stručni ispit po isteku pripravničkog staža od jedne godine za pripravnike sa visokom i višom školskom spremom, odnosno šest mjeseci za pripravnike sa srednjom školskom spremom.

(2) Radi sticanja uslova za rad na upravnim i drugim stručnim poslovima u organima uprave BiH, službama, tijelima i institucijama Vijeća ministara i institucijama koje imaju javna ovlaštenja, stručni ispit mogu polagati i lica koja se nalaze na radu u drugim organima vlasti i institucijama, odnosno u preduzećima (društvima) i drugim pravnim licima na teritoriji Bosne i Hercegovine (u daljnjem tekstu: BiH).

(3) Lica iz stava (2) mogu polagati stručni ispit kada po završenoj visokoj i višoj školskoj spremi provedu na radu u tim organima, institucijama, preduzećima (društvima) i drugim pravnim licima najmanje jednu godinu, a po završenoj srednjoj školskoj spremi najmanje šest mjeseci.

#### **II - PROGRAM STRUČNOG ISPITA**

##### član 4. (Oblasti)

Stručni ispit obuhvata slijedeće predmete:

- a) Osnove ustavnog sistema,
- b) Osnove uprave u BiH,

- c) Upravni postupak i upravni spor,
- d) Radne odnose,
- e) Kancelarijsko poslovanje u organima uprave BiH, službama, tijelima i institucijama Vijeća ministara BiH.

član 5.  
(Program stručnog ispita)

(1) Program stručnog ispita za pripravnike, lica sa visokom školskom spremom i zaposlenike na nivou BiH (u daljnjem tekstu: Program) sadrži gradivo, pravne izvore i literaturu za svaki predmet iz člana 4. ove odluke.

- (2) Program stručnog ispita propisuje ministar pravde BiH.
- (3) Program stručnog ispita objavljuje se u "Službenom glasniku BiH".

### III - SASTAV DRŽAVNE KOMISIJE I NAČIN POLAGANJA STRUČNOG ISPITA

član 6.  
(Komisija za stručni ispit)

- (1) Komisija se sastoji od predsjednika i četiri člana.
- (2) Ministar pravde BiH će imenovati jednu Komisiju koja će ispitivati kandidate sa srednjom i višom školskom spremom i tri Komisije koje će ispitivati kandidate sa visokom školskom spremom, u skladu sa brojem zahtjeva za polaganje stručnog upravnog ispita.
- (3) Komisija iz stava (2) ovog člana se sastoji od najmanje jednog predstavnika Ministarstva pravde Bosne i Hercegovine i određenog broja državnih službenika, predstavnika drugih ministarstava ili drugih institucija, agencija i organa uprave na državnom nivou, koje imenuje rješenjem ministar pravde BiH.
- (4) Predsjednik i članovi Komisije imenuju se ukoliko ispunjavaju slijedeće uslove:
  - a) da su diplomirani pravnici,
  - b) da imaju najmanje pet godine radnog iskustva u državnim organima uprave,
  - c) da su se istakli u radu na najsloženijim normativno-pravnim poslovima, poslovima upravnog rješavanja, upravno-nadzornim poslovima i drugim stručnim poslovima u državnim organima uprave i drugim državnim institucijama.

- (5) Komisija se imenuje na period od četiri godine.
- (6) Izuzetno, član Komisije može biti imenovan na još jedan mandat.

član 7.  
(Rješenje o imenovanju Komisije za stručni ispit)

- (1) Rješenjem o imenovanju Komisije određuju se ispitivači za svaki predmet iz člana 4. ove odluke.
- (2) Administrativne i tehničke poslove za Komisiju obavlja sekretar iz Ministarstva pravde Bosne i Hercegovine.
- (3) Rješenjem iz stava (1) ovog člana određuje se i zapisničar na stručnom ispitu i utvrđuju njegovi poslovi i zadaci.

član 8.  
(Uslovi za pristupanje polaganju)

- (1) Polaganje stručnog ispita obavlja se na pismeni zahtjev kandidata.
- (2) Kandidat iz člana 2. ove odluke, zahtjev za polaganje stručnog ispita podnosi Ministarstvu pravde BiH.

(3) Uz zahtjev se prilaže:

- a) dokaz o završenoj školskoj spremi,
- b) dokaz o završenom pripravničkom stažu, odnosno o radnom iskustvu u struci.

(4) Ministarstvo pravde BiH donosi rješenje kojim odobrava polaganje stručnog ispita za kandidate koji ispunjavaju propisane uslove, odnosno rješenje kojim se odbija zahtjev za polaganje stručnog ispita za kandidate koji ne ispunjavaju propisane uslove.

član 9.  
(Rješenje o odobravanju polaganja)

(1) U rješenju kojim je kandidatu odobreno polaganje stručnog ispita određuje se vrijeme polaganja stručnog ispita.

(2) U rješenju kojim se odbija zahtjev za polaganje stručnog ispita navodi se razlog zbog kojeg se zahtjev odbija. Protiv rješenja iz stava (1) i (2) ovog člana može se izjaviti žalba ministru pravde BiH u roku od 15 dana od dana prijema rješenja.

član 10.  
(Sjedište Komisije)

(1) Stručni ispit se polaže u sjedištu Ministarstva pravde BiH.

(2) Izuzetno, po odobrenju ministra pravde BiH, stručni ispit pred Komisijom može se polagati i van sjedišta iz stava (1) ovog člana, ako za to postoje opravdani razlozi.

član 11.  
(Sastav stručnog ispita)

Stručni ispit se sastoji iz pismenog i usmenog dijela.

član 12.  
(Pismeni dio stručnog ispita)

(1) Zadatak iz pismenog dijela stručnog ispita daje predsjednik Komisije ili član Komisije kojeg odredi predsjednik Komisije.

(2) Pri izboru zadataka za pismeni dio stručnog ispita kandidatu s visokom školskom spremom daje se pismeni zadatak iz najsloženijih poslova, sa višom školskom spremom iz složenih poslova, a sa srednjom školskom spremom iz jednostavnijih upravnih stvari.

(3) Pri izradi pismenog zadatka kandidat se može služiti samo zakonima i podzakonskim propisima.

(4) Uspjeh kandidata na pismenom dijelu ispita ocjenjuje Komisija sa ocjenom "zadovoljava" ili "ne zadovoljava".

(5) Ako je pismeni rad ocijenjen "ne zadovoljava" kandidat ne može pristupiti usmenom dijelu ispita.

(6) Nakon položenog pismenog dijela ispita koji traje 45 minuta kandidat pristupa polaganju usmenog dijela stručnog ispita.

član 13.  
(Usmeni dio stručnog ispita)

(1) Na usmenom dijelu stručnog ispita provjerava se osposobljenost kandidata za praktičnu primjenu propisa iz oblasti predmeta iz člana 4. ove odluke, a u okviru materije koja je sadržana u programu svakog predmeta iz člana 5. ove odluke.

(2) Na usmenom dijelu stručnog ispita ispitivači su dužni kandidate ispitivati samo o materiji koja je obuhvaćena programom ispita za visoku i višu, odnosno srednju školsku spremu koji se donosi po osnovu člana 5. ove odluke.

- (3) Usmeni dio stručnog ispita je javan.

član 14.  
(Polaganje ispita gluhih i nijemih lica)

- (1) Kandidat koji je gluhi ili nijem može pristupiti polaganju stručnog ispita.  
(2) Kandidat iz stava (1) ovog člana, cijeli ispit polaže pismeno.

član 15.  
(Ocjenjivanje)

- (1) Po završenom usmenom dijelu stručnog ispita, Komisija odlučuje o uspjehu kandidata, bez prisustva javnosti.  
(2) Konačan uspjeh kandidata ocjenjuje se prema ukupno pokazanom znanju na pismenom i usmenom dijelu stručnog ispita.  
(3) Komisija odlučuje o uspjehu kandidata ocjenom "položio stručni ispit", ili "nije položio stručni ispit".  
(4) Kandidat koji na stručnom ispitu pokaže nezadovoljavajuće znanje iz tri ili više predmeta, smatra se da stručni ispit nije položio.

član 16.  
(Popravni ispit)

- (1) Kandidat, koji na usmenom dijelu stručnog ispita ne pokaže zadovoljavajuće znanje iz jednog ili najviše dva predmeta, ima pravo da iz tih predmeta polaže popravni ispit.  
(2) Kandidat koji na stručnom ispitu ne položi jedan ili dva predmeta, popravni ispit iz tih predmeta polažu najranije u roku od 30 dana, a najkasnije u roku od 90 dana od dana polaganja stručnog ispita.  
(3) Kandidat koji ne pristupi polaganju popravnog ispita u roku iz stava (2) ovog člana, smatra se da stručni ispit nije položio.  
(4) Ako kandidat u roku iz stava (2) ovog člana ne položi popravni ispit, smatraće se da stručni ispit nije položio.  
(5) Kandidat koji na popravnom ispitu pokaže nezadovoljavajuće znanje smatra se da stručni ispit nije položio.

član 17.  
(Obaveza pristupanja zakazanom terminu)

- (1) Ako kandidat ne pristupi polaganju stručnog ispita u dan koji mu je određen za polaganje stručnog ispita, ili dan prije datuma određenog za polaganje stručnog ispita izjavi da odustaje od ispita, smatraće se da ispit nije polagao.  
(2) Ako kandidat odustane od polaganje već započetog stručnog ispita, ili ne preda rad iz pismenog dijela stručnog ispita, smatra se da ispit nije položio.

član 18.  
(Odgajanje zakazanog termina)

- (1) Odgajanje zakazanog termina za polaganje stručnog ispita može se odložiti najviše do 30 dana.  
(2) Ukoliko kandidat ne pristupi polaganju stručnog ispita na dan određen prema stavu (1) ovog člana smatra se da je odustao od zahtjeva za polaganje stručnog ispita.

član 19.  
(Odlaganje ispita)

(1) Započeto polaganje stručnog ispita može se, izuzetno, odložiti na pismeni zahtjev kandidata, ako je kandidat zbog bolesti ili drugih opravdanih razloga spriječen da nastavi polaganje stručnog ispita.

(2) O davanju saglasnosti za odlaganje polaganja započetog stručnog ispita iz stava (1) ove tačke, odlučuje Komisija većinom glasova o čemu se u spisu sačinjava službena zabilješka koju potpisuje predsjednik Komisije.

član 20.

(Nastavak polaganja započetog odloženog ispita)

(1) Započeto polaganje stručnog ispita može se nastaviti u prvom slobodnom terminu.

(2) U opravdanim slučajevima, na molbu kandidata, Komisija može rok iz stava 1. produžiti, a najduže za 60 dana od dana odlaganja polaganja započetog ispita.

(3) Ako kandidat u roku iz stava (1) i (2) ne nastavi polaganje ispita, smatra se da ispit nije položio.

(4) U nastavku ispita kandidat ne polaže onaj dio koji je položio do odlaganja ispita.

član 21.

(Uvjerenje o položenom stručnom ispitu)

(1) Kandidatu koji je položio stručni ispit Ministarstvo pravde BiH izdaje uvjerenje o položenom stručnom ispitu.

(2) Uvjerenje o položenom stručnom ispitu sadrži naziv organa, broj i datum izdavanja uvjerenja, ime i prezime kandidata, godinu i mjesto rođenja, školu koju je završio i kada, datum položenog stručnog ispita, naziv ispitne komisije, pečat i potpis ministra pravde BiH.

(3) U uvjerenju, u dijelu koji se odnosi na ocjenu o položenom stručnom ispitu, navode se riječi: "položio stručni ispit za visoku školsku spremu", "položio stručni ispit za višu školsku spremu", odnosno "položio stručni ispit za srednju školsku spremu".

(4) Ministarstvo pravde BiH će izdati Uvjerenje o položenom stručnom ispitu na jeziku i pismu u skladu sa zahtjevom kandidata.

član 22.

(Ponovno pristupanje polaganju)

Kandidat koji nije položio stručni ispit može ponovno pristupiti polaganju stručnog ispita po isteku roka od 60 dana od dana polaganja ispita.

član 23.

(Troškovi polaganja)

Troškove polaganja stručnog ispita snosi kandidat.

član 24.

(Visina naknade polaganja)

(1) Visinu naknade za troškove polaganja stručnog ispita pred Komisijom, rješenjem određuje ministar pravde BiH.

(2) Predsjedniku, članovima Komisije, sekretarima, kao i zapisničarima pripada naknada za rad u Komisiji što se određuje rješenjem iz stava (1) ovog člana.

član 25.

(Zapisnik)

(1) O polaganju stručnog ispita vodi se zapisnik u koji se unosi: sastav Komisije, datum i mjesto održavanja ispita, ime i prezime kandidata, postavljena ispitna pitanja i ocjena uspjeha kandidata.

(2) Zapisnik iz stava (1) ovog člana potpisuje predsjednik, članovi Komisije i zapisničar.

(3) Zapisnik o polaganju stručnog ispita prilaže se uz zahtjev kandidata za polaganje stručnog ispita sa priložima i pismenim zadatkom koji je kandidat izradio.

član 26.

(Administrativno-tehnički poslovi i evidencija)

(1) Administrativno-tehničke poslove za rad Komisije i evidenciju o kandidatima koji su polagali stručni ispit vodi Ministarstvo pravde BiH.

(2) Evidencija iz stava (1) ovog člana, vodi se u vidu knjige koja mora biti uvezana i ovjerena a stranice označene rednim brojevima. Ovjeru knjige vrši ovlašteno službeno lice. U evidenciji se upisuju slijedeći podaci o kandidatu: ime i prezime, godina rođenja, naziv škole koju je završio, datum polaganja stručnog ispita, ocjenu uspjeha na ispitu i broj, datum i mjesto izdavanja uvjerenja o položenom stručnom ispitu.

(3) Evidencijska knjiga iz stava (2) ovog člana čuva se trajno.

#### **IV - PRIJELAZNE I ZAVRŠNE ODREDBE**

član 27.

(Oslobađanje obaveze polaganja)

Lice koje je položilo stručni ispit u okviru drugih struka, oslobađa se obaveze polaganja stručnog ispita predviđenog ovom odlukom, pod uslovom da program tog ispita sadrži sve predmete iz člana 4. ove odluke, s tim što je obavezno polagati one predmete iz člana 4. ove Odluke koji nisu položeni u okviru ispita drugih struka.

član 28.

(Promjene školske spreme)

Lice koje je poslije položenog stručnog ispita steklo viši stepen školske spreme od stepena školske spreme za koji je položilo stručni ispit, mora imati položen stručni ispit školske spreme koju je naknadno steklo, radi obavljanja poslova i zadataka radnog mjesta čije vršenje je uslovljeno višim stepenom školske spreme.

član 29.

(Prelazne odredbe)

Lica koja su položila stručni ispit za radnike organa uprave po propisima koji su se primjenjivali na teritoriji BiH do dana stupanja na snagu ove odluke, smatra se da imaju položen stručni ispit predviđen ovom odlukom.

član 30.

(Priznavanje ispita položenog po entitetskim propisima)

(1) O priznavanju stručnog ispita lica koja su taj ispit položila po propisima entiteta i Brčko Distrikta, nakon stupanja na snagu ove odluke, odlučuje ministar pravde BiH uzimajući u obzir program po kojem je ispit položen i program predviđen ovom odlukom.

(2) Priznavanje ispita iz stava (1) ovog člana, vrši se na pismeni zahtjev zainteresovanog lica s odgovarajućom dokumentacijom, o čemu se donosi rješenje.

član 31.

(Lica oslobođena od polaganja stručnog ispita)

Stručni ispit nisu dužna polagati:

- a) lica koja imaju položen pravosudni ispit;
- b) lica koja su položila javni ispit pred Agencijom za državnu službu Bosne i Hercegovine.

član 32.

(Djelokrug primjene)

Odredbe ove odluke primjenjuju se i na pripravnike i zaposlenike u uredima i službama tijela zakonodavne vlasti, tijela izvršne vlasti, tijela sudske vlasti, tužilaštvima, pravobranilaštvima, ustanovama za izvršenje krivičnih sankcija i drugim organima i institucijama BiH kod kojih je, saglasno zakonu, kao uslov za obavljanje poslova predviđen položen stručni ispit.

član 33.  
(Donošenje Programa)

Ministar pravde BiH donijet će program stručnog ispita iz člana 5. ove odluke, u roku od 60 dana od dana stupanja na snagu ove odluke u suradnji sa Uredom za zakonodavstvo i Agencijom za državnu službu Bosne i Hercegovine.

član 34.  
(Prestanak važenja ranijih propisa)

Stupanjem na snagu ove odluke prestaje da važi Odluka o uslovima i načinu polaganja stručnog upravnog ispita pripravnika, lica sa visokom školskom spremom i zaposlenika na nivou Bosne i Hercegovine ("Službeni glasnik BiH", br. 46/04, 50/05 i 58/07).

član 35.  
(Stupanje na snagu)

Ova odluka stupa na snagu danom donošenja i objavit će se u "Službenom glasniku BiH".

VM broj 307/10  
18. novembra 2010. godine  
Sarajevo

Predsjedavajući  
Vijeća ministara BiH  
Dr. **Nikola Špirić**, s. r.